

四庫全書

集部

欽定四庫全書

集部

石倉歷代詩選卷三百八十五

十六

詳校官編修臣謝振定

侍讀臣孫球覆勘

總校官進士臣朱鈴

校對官檢討臣李學錦

謄錄監生臣朱珩

欽定四庫全書

石倉歷代詩選卷三百八十五

明曹學佺編

明詩次集十九

何喬新

越王臺懷古次南谷韻

甌閩古建國釣龍有遺臺臺空龍已逝  
沕穆祠宇開劒履掩虛幌丹青雜荒苔  
念茲句踐胄桓桓亦奇才援戈

逐秦鹿土宇日以恢疏封受赤社組練咸陽回貢篚來  
百粵威聲振九垓緬懷全盛日意氣亦雄哉至今奠椒  
醕猶有遺民來魚燈已黯黯馬鬣尚累累故宮渺禾黍  
落日潮聲哀感此發長喟登臨為徘徊

潞城懷古

朝出上黨城晝抵嬰兒國民俗固質野原田亦磽瘠西  
望荆卿墳蒼然閔榛棘衛公有遺祠繪事儼冠烏我懷  
馮野王自少謹脩飭雖云世所賢衆枉紛忌直初焉斥

藩邦繼乃困微纒積善云有慶伊人死讒慝天道良悠  
悠古今同太息我欲訪松楸剪薙加培植空原渺無覩  
悵望淚沾臆

懷郭汾陽

華清春晝長羯鼓聲方競鐵騎來漁陽翠華遽西幸郭  
公真雄才仗鉞事戡定北征掃撓搶東討戮梟獍回鶻  
請受盟吐蕃夜奔迸從容進退間順人且安命奸閹亦  
革面灑涕起深敬汾陽啓茅土寵眷一何盛安危繫一

身夷虜知名姓中興多英賢福履誰能並茂績紀汗青  
千秋尚輝映

陽諫議

晴壑凝黛色寒溪漾澄流睠昔陽諫議韜光此夷猶賢  
聲徹黼座徵詔來林丘遂辭鹿豕羣去與鵝鷺遊謂公  
當蹇蹇而公但悠悠青蠅忽止藩賢相投荒陬公乃叩  
閣爭累疏不自休精忠貫皎日勁氣凌清秋白麻不果  
降儉佞恚且羞公歿數百歲士風日以偷旂旄荃與蕙

茲焉化為茅朝陽無鳴鳳立仗多驂騑思公不可見悵然抱孤憂

文潞公

亭亭潞公軒  
膺膺翼城縣  
公昔宰縣時  
琴觴此游衍  
泉石清且幽  
芳林亦葱蒨  
一朝秉鈞軸  
德望膺殊眷  
建儲耻言功  
被劾不自辯  
管鑰司北門  
旌麾靖東甸  
廟堂殊雍容  
士庶自歡抃  
偉哉社稷臣  
百世能幾見  
平生仰高風  
覽物增遐睠  
典刑邈難覩  
俯仰淚如霰

司馬溫公

瑤臺何巍巍，涑水亦瀾瀾。我公獨何之，空堂遺劒履。念昔熙寧初，事事稽周禮。新法紛如毛，舊基寢以圯。公時居洛師，容與花竹裏。朝被嵩阜雲，夕釣伊川水。宣仁始臨朝，翻然為時起。惓惓撫瘡痍，汲汲除莠穢。坐令憔悴民，復見雍熙理。胡為厭氛濁，溘然騎箕尾。清忠與粹德，令聞傳不已。嗟余生已晚，高山夙仰止。稽首遺像前，酌泉薦芳芷。



昭君詞

昭君在掖庭皎皎冰玉姿絕色恒自負不肯賂畫師君  
王不識面遠嫁與胡兒愛惡元有命不在妍與媸名花  
委荒穢小草植軒墀古來盡如此悲歎亦奚為

真氏女

女乃文忠公之裔孫當元時仕為筦庫負官錢數  
十萬鬻其女以償久之流落倡家女以堅貞自持  
日隨其儕出惟歌雅詞吹洞簫而已狎客不敢犯

姚牧庵為承旨嘗會客翰林院女以善歌往供奉  
牧庵聞其作閩語詢知其故而憐之告于所司脫  
其籍以嫁院吏黃逮逮後仕至顯官客有談其事  
者予因賦詩以紀之

妾本相門女少小顏如玉阿爺負官錢鬻妾以自贖詩  
書不復理學唱金縷衣當筵歌一曲贏得錦纏歸相君  
名世儒聞歌忽驚訝詰問始知因矜憐重悲詫告官脫  
妓籍禮送歸名家紗窓理舊業肯復歌淫哇昔為糞上

英今作閨中秀長安遊冶郎詎敢闕窓牖羅裳與象締  
淡然儒家粧良人詞苑吏不數羽林郎今宵復何宵三  
星正當戶喜極忽成悲潛然淚如雨幽蘭植糞壤芳潔  
常猗猗妾身猶處子郎君當自知

水碓

村居淡無營所需在粒食引泉運雙杵匪藉樵青力颺  
輪駛若飛怒湍亦衝激月明響丁丁隨風入寥泐精鑿  
諒天成功利妙無迹却憶漢陰言絕然長太息

夏夜獨坐

炎宵苦煩燠燕坐綠樹陰涼颼天際來朗月照我襟幽  
懷鬱未展忼慷撫鳴琴初彈龜山操再奏猗蘭吟曲盡  
長太息悠悠孰知音俚耳厭苦淡新聲競哀淫懷哉荷  
簣者猶識宣尼心

田家即事效陶彭澤

春至原草綠驅牛出東隄野廩避我走田家向我啼放  
牛恣所適植杖采柔薇倦來卧松下松高暑氣微俯聽

流泉聒仰視浮雲飛日暮騎牛還  
穉子候柴扉濁醪聊自慰相顧情  
依依但願長如此安知慕輕肥

秋感

方塘澹無波風起感文穀亭亭芙蓉  
花穠艷照晴綠顧茲搖落時蘋蓼紛  
在目豈知窈窕姿寂寞寒江曲想應  
厭紛華寄此媚幽獨我來當杪秋臨  
風挹寒馥但憂芳歲晏月白霜華肅

其二

褰裳涉秋水言采芙蓉花采之欲誰遺所思在天涯念  
與君別時春風茁蘭芽蘭枯秋露冷君行未還家豈與  
一樽酒亦有箏與琶單居誰與歡俛仰增長嗟此花何  
足愛遠寄比容華但恐去路遙零落同羣葩

涪陽道中

秋郊雨初霽駕言適涪陽炎氛淨如洗高樹含新涼蕙  
草已斂色菊花正揚芳微風來遠壑衆綠紛披揚溪濱  
暫稅駕水石鳴琳琅渚沙粲如雪鷗鷺雙飛翔低迴翫

物理塵想頓消忘落景麗西嶠漁歌起滄浪蒼然暮色  
至候騎紛道傍登眺興未窮悵然陟崇岡

送朱方伯

春郊雨初霽綠樹含華滋使君駕言邁雙旆風披披峻  
函渺何許去路正逶遲且罄同袍歡飲餞江之湄開樽  
酌芳醕授簡哦新詞賓從勸且酬不覺駛景移念茲長  
安道年來困創夷窮邊吼豺虎孤戍屯熊羆君行殿藩  
服一展胸中奇露檄諭䟽勒揮戈斬屠耆坐令三邊士

賣刀事鋤犁功成奏丹宸峻擢擁旌麾君車日已遠會  
晤當何時願言樹嘉績慰我渴與飢

齋居對雨懷惟孝

瑤臺雙靈鳥文采何歲蕤簫韶感清夢飛下丹山陲鳴  
聲殷笙磬羣喙徒啞咿鵲鴻苦相妬況此鴉與鷗棲息  
每非所羽毛日摧萎願言共高舉結巢碧梧枝養此五  
采翎遠彼百鳥嗤

題明皇秉燭夜遊圖



沉香亭上烏飛速歌吹未終宮漏促歡娛不極可奈何  
夜遊更秉西園燭銀盤萬炬照天紅恍如赤日行晴空  
更將羯鼓催花柳共言聖主真天公太真娉婷奉卮酒  
願上大家千萬壽隋家天子放流螢熠燿微光詎能久  
伶官再拜前致詞祇合四海皆熙熙將有祿山相林甫  
聖人不樂復何為念奴高歌八姨舞麟膾駝峰薦雕俎  
明朝且放紫宸朝翠帳醒來晝方午金鷄帳裏卧猪龍  
內寵不減花秦宮昏昏醉夢日復夜豈惜興衰在眼中

桃林一戰血沒踝薄暮不見平安火蒼茫西出馬蒐坡  
驛舍無燈相枕卧斜谷鈴聲暮雨寒歸來無復舊時歡  
霜凝煙瓦不成寐怨對孤燈夜未闌

題幼安濯足圖

當塗睥睨漢家鼎江左孫郎恣馳騁茫茫九域戰塵飛  
潔身東適玄菟境黃雲黯黯炎精昏避地且復依公孫  
公孫非有興漢志俎豆詩書聊共論誰云此地東鄙  
箕子舊邦風化美同遊不獨邴與王尚友欲追孤竹子

獅子猖狂事漸非，扁舟浮海又西歸。  
尚愁黃塵浣吾足，褰裳自濯滄浪溪。

讀西臺慟哭記

北風怒撼龍舟覆，十萬貔貅葬魚腹。  
廬陵魁輔死燕山，頸血化為原草綠。  
當時門下多俊材，烏散雲消那敢哭。  
裂冠毀冕彼何人，俯首穹廬食讎粟。  
轅門從事抱孤忠，芒屨潛行嚴瀨曲。  
肯隨留葉立新朝，甘與方吳卧空谷。  
朔風直上千仞臺，采采溪毛薦寒渌。  
歌殘楚些招不來。

蕭瑟寒飈振林木仰天長慟天亦愁山鬼驚啼猿躑躅  
冬青樹下頻往還淚眼摩挲望天目鳳逝龍亡王氣  
消日暮驚鳥止誰屋褰裳幾度濯江潯尚恐胡塵浣  
吾足帝曰巫陽汝下招促駕青虬歸玉局饒歌騎吹  
世空傳月表未成竟誰續毅魄雖埋神不沒仙遊想在  
文山麓相逢握手共欷歔細論興亡淚如掬浮雲倏忽  
風中燭忠義千年有餘馥歸然荒塚釣臺東我欲乘風  
奠醺醑

題陰厓舞鳳圖

畫船昨泛湘江曲江上蕭疎森紫玉天邊彩鳳忽飛來  
羽毛猶帶湘雲綠陰厓曉霽暖煙消翠蕤飛舞風翛翛  
九疑凝黛湘波靜林間彷彿聞蕭韶黃陵廟前春欲暮  
鷓鴣啼斷斑斑雨好向虞廷覽德輝碧梧拳拳搏桑曙  
題霜林孤鷹圖

霜林搖落秋天迥鷺鳥摩空風力勁大鵬却避狡兔愁  
老樹無聲萬山靜喬柯獨立何雄哉金眸玉爪非凡材

健翮孤騫晴雪落老拳怒攫寒雲開荒城古社多狐鼠  
閱翳荆榛嘯煙雨乘秋一掃妖穴空萬里寒霄看高翥

題單于出獵圖

陰山寒飈捲晴雪白草蕭蕭凍欲折名王校獵曉合圍  
萬騎蹴冰如蹴鐵狐裘貂帽紫絨絛上凌大磧下深濠  
驍騎咆哮聲震地毛羣無計可潛逃駕鵝戛戛來何許  
一片晴雲蔽天宇海青直上驚且雄頃刻平蕪灑紅雨  
紛飛鷗鶴與鷺鷥雨血風毛墮獵場羣騎獻獲名王笑

割鮮野食駝蹄香金輪半墜西山缺鏡管嘲轟向區脫  
解鞍繫馬未肯眠笑擊黃獐飲其血白旂忽動幹難河  
猛士更比金源多柴潭已涸蔡州破狡兔雖肥奈爾何

秋夜搗衣曲

高梧露墜銀牀冷宮漏沉沉夜初永碧落無雲月正中  
樓臺滉漾玻璃影輕移芳屐下空庭未拂瑤砧已愴情  
玉腕徐揮搗寒素丁東寫出斷腸聲非絲非竹亦非木  
碎珮繁鈴斷還續壯如巫峽瀉春濤清似寒溪漱鳴玉

商聲鳴咽徵聲悲散入秋空遠更微公主辭唐嫁回紇  
文姬歸漢別胡兒乍沉乍振聲尤苦顧影無言淚如雨  
嚴陵臺上哭孤臣白傅舟中泣商婦砧聲轉急愁轉深  
栖烏驚起啼霜林長風吹入征夫耳應識香閨悵望心  
玉杓斜指天將曙停杵淒然倚庭樹却愛蓮塘水不波  
雙鴛交頸眠香霧

題桃源圖

咸陽鹿走羣雄起河北山東多敵壘楚鄉耆舊獨知幾



避地移家阻煙水煙水茫茫別有天塵寰疑是地行仙  
誅茅剪棘初為室引水開渠漸種田老翁侵晨放雞鶩  
穉子乘春藝桑竹無刑無賦省追呼淳風自是羲皇俗  
兒孫更抱日相親酒食時常會里隣桃花隔斷人間路  
不識西風有戰塵漁郎鼓櫂來何許競引歸家具雞黍  
當時祇記有秦皇此日方知為典午水流花謝路秦蕪  
誰把仙源託畫圖雲山有路如可訪便擬為隣德不孤

### 黃樓

黃樓西來坤軸折濁浪排空天欲裂彭城老穉哀哀啼  
自分闔門作魚鼈仁明太守眉山翁誓以隻手障其衝  
指麾徒旅荷畚輦長溪隱起如晴虹波恬浪靜民安堵  
共喜更生歌且舞九重下詔侈褒嘉拯溺禦災非小補  
飛樓高壓城之東張筵會客何雍容後山作銘頴濱賦  
筆力直與造化爭瓌雄神遊八表知何處贏得穹碑照  
今古當年舒李今何如羈鬼啾啾泣煙雨

文選樓在襄陽

漢江綠遶南雍州  
敗瓦頽垣江上頭  
羗兒牧豎笑相語  
云是昭明文選樓  
昭明好學無與比  
鬪雞肯效諸王戲  
古今作者浩如煙  
欲選雄渾垂萬世  
旁搜陶謝曹劉詩  
細閱班揚賈馬辭  
明珠溢目取照乘  
夷玉在序收懸藜  
江籬沅芷萃靈囿  
亦有殷彝及周卣  
誰云小兒強解事  
作者藉之傳不朽  
江陵典籍亦已多  
七官文字勤搜羅  
當年不作千秋計  
化作飛煙奈爾何

柴潭樓

在汝寧

金源立國雄且武蹴宋殲遼跨中土豈知中葉漸陵夷  
虜闕憑陵有蒙古燕京南遷到汴京花帽不守杏花營  
黃河已失合達死猶欲假息懸瓠城懸瓠額額近荆楚  
京湖亦有復仇舉長圍已合效魚麗癡心尚恃柴潭固  
柴潭樓下碧漪漪上有伏弩下潛螭一朝決之入汝水  
螭亡潭涸竟奚為幽蘭軒中苦復苦分取遺骸藏宋圉  
當年忠烈冠華夷惟有忠臣忽斜虎

見燕憶兒來鳳

去年燕來時吾兒歡笑牽我衣口誦差池頡頏句婆娑  
庭下看雙飛今年燕復至吾兒嗟已逝梁間空聽燕呢  
喃不見兒來堂下戲燕兮秋去春復來吾兒一去不再  
回沉思弱質今何在芳草寒煙翠作堆草色青更青我  
心苦復苦不獨聞猿堪斷腸見燕傷心淚如雨

讀余玠遺愛碑

北風蕭蕭戰血腥殺氣晝壓蠶叢城將軍俯首送降表  
況敢仰視撓其兵龍圖學士奮戈起隻手欲障橫流水

丹家兄弟亦英雄獻策魚山築高壘連雲戰格控黔中  
鐵馬金戈氣勢雄敵兵睥睨不敢近兩川再造伊誰功  
青蠅紛飛點白壁臺諫承風競彈擊指忠為逆逆為忠  
志士含冤氣填臆萬里長城忽自摧蜀中士女空悲哀  
敵騎從此蹂吳甸金闕瓊樓起戰埃招賢亭館今何在  
尚有殘碑紀遺愛欲持杯酒酹忠魂彷彿雲中見麾蓋  
君不見馬伏波蠻兵未破謗已多又不見岳武穆黃龍  
未到家已覆功名自昔保全難烏盡弓藏世共歎江頭

廢壘苔花紫千載英雄掩淚看

禽言六首

行不得也哥哥山有羆虎水有蛟鼉銛牙利爪競塞路  
仗劍欲往誰敢過勸君歸來且高卧苦竹岡頭安樂多  
不如歸去人生多被功名誤宦成名遂能知足自昔惟  
推䟽太傅萊公再相老不歸可憐遠謫戍州戶

蘄州鬼譴論從來多逆耳有言逆耳奈若何罷官遠竄  
南荒死當時諛佞非不多端笏朝堂相天子

脫布袴杼軸已空那得布舊袴綻裂願脫之新袴家貧  
誰與做剥膚椎髓何紛然循吏今無廉叔度

婆餅焦不逢樂歲逢玄枵困倉久空兒索餅啼飢滿屋  
聲曉曉馬糞火中且煨麵敢望當年煉火燒

提葫蘆相攜共向黃公壚竹葉青兮秋露白問君所嗜  
為君沽一杯一曲莫辭醉重來愁聽笛聲孤

遊鼓山次王一僉憲韻

花梵鐘聲遠莓臯石逕微山花晴墜几泉沫冷沾衣香



閣僧眠穩懸巖客到稀來遊愜清賞日暮未言歸

谷羊公館次尹亞叅韻

石逕煙蕪綠行行思轉迷雲深田蛤吠雨歇竹雞啼流水聲鏘玉橫橋影似霓欲窮登覽興殘照墮林回

獅峯寺次景澄韻

象宇臨幽境猊峯竦異形松雲侵榻冷竹露墮衣青唳鶴驚晨鼓啼鶯亂午鈴停車問民瘼淒楚不堪聽

宿普門寺

畫壁丹青古祇園竹樹深花香來別磴松翠墮危岑雲  
暝龍歸鉢天空鶴度林老懷清似洗不愧古禪心

商王河亶甲廟

遷國啓雄圖遺靈食舊墟明禋來郡邑禱賽集樵漁德  
業三宗後丹青百禩餘樂天嗟已矣誰為補亡書

書天寧寺壁

聽訟來彰德星軺駐上方蒲團花雨潤石竈茅煙香古  
塔棲秋鶻空階咽暮蟬雙槐行坐處人說似甘棠

魯山曉發

曉發魯陽城城頭月正明  
花驄衝宿霧玉節映疎星  
茅店客猶睡荒村雞乍鳴  
塞帷將問俗不為看山行

武寧關書事

奉詔遠行邊雙旌拂錦韉  
陣形魚麗法謀畧豹韜篇  
草滿蜚狐塞沙填飲馬泉  
功成何所願遺像畫凌煙

又

羣峯環拱處截窠峙關城北  
近戎王壘南連漢騎營  
風

高懸旆裂雪暗凍輦鳴試數防邊將誰如李北平

歸田述懷

謝病離天仗山田自墾荒蛙聲占水旱雞骨卜災祥春  
釀黃柑美晨羹紫蕨香閒居多樂事洗硯寫新章

偏頭關書事

金湯天設險形勝壯遐荒地控黃河阨山連紫塞長別  
營貔虎卧分陣鶴鵠翔羽檄通西極烽煙接朔方降胡隨  
畜牧戍卒事耕桑土屋冬偏煖松棚夏獨涼樺林藏蟄

獸麋墮走羣狼雲暗金笳急風高鐵騎強承恩司管鑰  
敷德輯戎羗聖化雖無外神州自有疆洗兵青海上秣  
馬黑山陽誓斬樓蘭首銘功答聖皇

次文瑞僉憲遊鼓山韻

靈山何巖竊高瞰弱流東萬井喧俱寂諸天路可通松  
雲春黯黯花雨晝濛濛浴鳳池波冷潛龍石竇空祇園  
珠作寶梵刹玉為宮文物懷先哲胚胎想化工叨陪羣  
彥後並駕此山中細草承香轂垂楊繫玉驄沉煙凝瑞

靄寶燄炫晴虹已喜朋簪盍還憐意味同繡衣來上客  
華悅侍羣童對奕慚予拙論文羨子雄鶴隨飛佩舞花  
映醉顏紅綠業唾禪伯風流仰謝公詩成鬼神護何必  
羨紗籠

倒馬關

漢代飛狐道今朝倒馬關危峯臨晉甸秀色接燕山倦  
翮飛難度羸驂去復還秋高笳吹急月冷柝聲閒路控  
八盤阨溪流九折彎雞鳴紅樹裏人住白雲間牙帳衝

煙濕金戈過雨斑  
戍兵勞校閱樵徑厭躋攀  
烽火通荒徼塵埃變壯顏  
何當歸報命玉陛遙鵷班

賓筵留詠

鑾坡退直共論文  
華館從容日已曛  
碧甕酒分仙掌露  
紫檀香裊博山雲  
黃柑錦荔皆珍味  
玉麈絺綌總異聞  
鄙劣每慚知遇厚  
惟歌旣醉頌夫君

無題

綺窓香透桂花風  
夢遶披香別殿東  
仙島不容羸使到

天河寧許漢槎通長蛾鎖恨微顰翠嬌靨傷春淺暈紅  
惆悵別來憔悴甚鏡中羞見鬢如蓬

和高居正秋臺齋宿韻

親承天語下瑤臺齋閣同攜襖被來茶淪龍團閒嘯咏  
香凝燕寢喜追陪起看紫極璿杓轉坐待彤庭玉鑰開  
欲寫蕪詞賡絕倡慚非汝士軼羣才

陸君孟昭以元宵會客同寅高君居正即席賦  
詩和者相屬余適以事不及往乃用居正韻



以謝

玄露香浮白玉卮相拚一醉對芳時  
銀河夜轉斗橫柄  
火樹春回花滿枝  
繡戶月明歌韻香麗譙  
風細漏聲遲  
慚余未得陪清賞  
吟對寒窓綠幕垂

金山曉鐘送陳巨源父南歸

浮玉山前曉駐舟  
鯨音隱隱吼林丘  
驚回幽壑潛蛟夢  
喚醒孤舟倦客愁  
遠逐角聲聞鐵甕  
清魚漁唱落滄洲  
分明夜半楓橋泊  
月色江聲滿目秋

擬唐人送宮人入道

金屋蹉跎雪滿顛  
官家有詔許求仙  
夜眠不作湘雲夢  
曉誦應忘璧月篇  
好共采鸞遊潯沆  
休教飛鷺妬嬋娟  
碧桃花底吹笙處  
猶似承恩侍御筵

擬送狀元歸畢姻

恩榮醉罷曲江春  
又詠桃夭出紫宸  
奠雁正當鳴雁候  
乘龍元是化龍人  
金蓮影晃銀屏曉  
御酒香浮翠杓新  
莫戀洞房鴛夢好  
須歸鳳閣掌絲綸

小軒夕坐思歸浩然

閱盡人間是與非  
鄉心戀戀北山薇  
坐憐黃菊霜前老  
笑指閒雲雨後歸  
已學莊生齊得喪  
懶從詹尹卜從違  
歸歟却袖屠龍手  
重向江頭訪釣磯

登岳陽樓

雲窓月牖俯清流  
滿目山川快壯遊  
誰在江湖懷北闕  
謾誇樓閣冠南州  
朱絃夜鼓湘靈瑟  
錦纜春迴楚客舟  
欲起靈均歌九辨  
澧蘭沅芷正颼颼

沅州

潭陽遠在夜郎西  
石逕縈紆路轉迷  
俗獷猶存盤瓠舊  
林深惟聽鷓鴣啼  
茅簷彫敝哀三戶  
嵐靄氤氲接五谿  
欲弔靈均何處是  
江頭蘭芷正淒淒

甘肅元旦次朱都憲韻

玉闕晴雪絕狼煙  
殊勝呼韓款塞年  
萬竈貔貅森列衛  
兩班冠劍儼羣仙  
明珠翡翠來重譯  
卉服氍毹共一天  
羽檄不飛刁斗靜  
會看嘉績勒燕然

過長城

斷垣迤邐亘縻坪云是秦人舊築城  
折戟每因耕後出斜蒿時向雨餘生  
甕門草滿鼃鼃嘯雉堞雲消鶴鶴鳴  
東望狼村三舍近淒淒煙樹倍傷情

挽德安張都憲瓚

黃鶴磯頭醉別筵別來雲樹兩茫茫  
纔聞奏對趨三殿忽訝音容隔九泉  
衰草晚煙平寇壘長堤春水餉兵船  
欲尋斧屋湏川曲鼓子花殘落照邊

送李黃門孟暘使占城

金函頒詔出彤墀特命儒臣使島夷  
龍節遠稽周典禮  
雞林重覩漢官儀  
海雲歛色迎丹仗  
水怪潛形避絳旗  
路過越裳煩告諭  
皇家威德邁周時

和安道憲副潁陽元日述懷

行臺吏散晝無譁  
此處停驂即是家  
古柏每憐含晚翠  
枯荻漸覺換春華  
壽杯香泛金莖露  
瑞雪寒凝玉樹花  
却笑病軀偏冗迫  
晨興不待玉衡斜

宋王宅

舊宅蕭條泮水隅  
騷人曾此託幽居  
荒臺日暮無行雨  
廢圃春深有揭車  
茂樹欂櫨搖落後  
姱辭矐朗變風餘  
巫陽歌罷秋天迥  
應有遺魂返故墟

樊城懷古

斷垣衰草古樊城  
勝國當年此戰爭  
往事已隨流水逝  
空山猶倚暮雲平  
旂常隱隱仁王寺  
葭蒹蕭蕭虜將營  
登眺悵然懷往昔  
蒸民歌罷不勝情

謁賈太傅祠

經國材猷迥絕倫  
春秋以後見斯人  
誰知一代興王佐  
遽作三湘放逐臣  
斜日坐隅來怪鳥  
寒煙江上弔靈均  
須知窮達皆由命  
何用悲傷自殞身

山亭瑞香次宗源韻

翠袖珠翹吐異香  
不隨羣卉競春陽  
名園臺榭今餘幾  
得似山亭晚更芳

重過黛凝寺次景澄韻



三年四度訪禪家  
兩見凋零兩見花  
今日朱轡重駐此  
綠陰彌望盡桑麻

石牛驛次南谷韻

苦雨炎風促去程  
此心那為世間名  
願將幾滴天瓢水  
一洗閩山萬壑清

汀州行臺次易庵韻

榕陰垂綠暗  
閩溪蹀躞花驄去  
欲迷駐節行臺心  
獨喜幽林無復怪禽啼

玉華洞次易庵韻

洞前琪樹倚雲栽  
洞裏瑤華映雪開  
一自飛軒遊碧落  
月明空見鶴歸來

道傍李花為風雨所殘

綈袂珠襦白玉冠  
含悽無語怯春寒  
東風不為多情惜  
無數殘鈿趁馬鞍

過斜頭遇雨

肩輿薄暮過斜頭  
風雨蕭蕭送旅愁  
太息人家生計盡

柴扉不掩野麋遊

行部上杭道過三洲館見白花生枳棘中芳潔  
可愛而不知其名問之村民曰文壇花也予  
哀其託根非所賦詩唁之又推花意而答賦  
焉

雪彩冰姿傍棘叢那堪苦雨更斜風五侯亭館多閒地  
何事淒涼向箇中

錄村氓語

行營昨夜運糧回今日還差送甲來道路奔馳何日已  
石田強半是蒿萊

題梅竹卷

黎雲漠漠楚天低綳袂相逢思欲迷斗轉參橫寒漏永  
夢迴惟聽翠禽啼

姑射仙人冰雪姿珠冠瓊佩下瑤池湘江帝子元同調  
翠袖相依歲晚時

題松

虬枝夭矯翠參天雨榦霜皮老更堅  
榱桷年來收拾盡  
豈知梁棟在山巔

晉陽途次所見

苜蓿花開松粉飄貧家生計轉蕭條  
平原處處無牟麥  
山鳥休呼婆餅焦

錄村謳言

賣却嬌兒換豆歸那知種豆盡為箕  
空令骨肉東西散  
不得杯羹療母飢

過故相第二首

門掩西風晝不開  
蜘蛛滿壁粉牆頽  
庭前乳犬休驚吠  
無復懷金暮夜來

偃月堂空複道深  
薔薇零落棘成林  
楂楂喜鵲歸何處  
不到人家送好音

白羊石

白石離離似白羊  
嶄然頭角徧沙場  
獨慚未學初平術  
一任閒眠對夕陽

山居觀物偶成

雙燕應懷舊主人  
巡簷緝壘往來頻  
却嗟老圃春光暮  
黃蝶紛飛過別隣

石倉歷代詩選卷三百八十五



欽定四庫全書

石倉歷代詩選卷三百八十六

明 曹學佺 編

明詩次集二十

王越

榆林送武靖侯趙公還京

古人一日別常懷千里思  
況在天之涯而與君相離  
風寒歲云暮夜永雞鳴遲  
悠悠行路難苦樂心自知  
人生

如浮雲聚散安可期君歸日以遠我歸當何時豈不念  
鄉國顧此王事縻霜月滿孤城照見遊子悲

中秋對月用孟浩然韻

明月下空庭清光寒不濕褰簾坐未久忽見飛螢入客  
懷寂無聊何處砧聲急對酒不成吟起向西風立

偶出

客況久岑寂薄言試春遊草色漫成綠野塘新水流閒  
雲自來往落日山光幽時景不待人中有千古愁古人

去不返今人空白頭茲懷眇難語惆悵歸未休

酷暑

祝融鞭起火龍怒赤尾搖空掃雲霧海波萬丈煎欲乾  
五嶽查滓碎如蠹徙薪移突竟無功爛額焦頭肯相顧  
封姨忍氣莫敢噓阿香停車莫敢度玉皇深拱九霄宮  
此患如何猶不悟昨日我從天上來便欲還從天上去  
去時直造玉皇前伏願傾心細陳訴願驅祝融鞭火龍  
好把陰陽再調護我歸奚用借天瓢手挽銀河顛倒注

洗清寰宇息風煙大使蒼生蒙雨露

題蠲上人畫

好山萬仞高插空羣峯並列青芙蓉大峯突兀如盤龍  
小峯箕踞如蹲熊峯頭雜樹亂如草凌霄獨立蒼蒼松  
松南小逕通幽谷谷口脩脩數椽屋疎籬影射夕陽紅  
虛牖光搖流水綠山中屋貯山中雲山中雲卧山中人  
山中之人愛明月夢想清光眠不得起來行過曲欄干  
石上呼童掃殘葉清風兩袖吹欲飛瓦鼎時燒紫檀屑

舉頭竊語問嫦娥爾好叮嚀為儂說玄霜春粉幾宵殘  
霓裳舞破何時徹夜寒語罷寂無聞但見滿天秋露白  
露華零落天將曉轉聽嫦娥聲悄悄胸中別有一般情  
紫雲恒注爐煙裊

走筆送謝大叅

捲地風寒聲冽冽夜深吹落關山雪夫君何者遠相過  
一片冰花凍髯結便呼斗酒澆離腸談笑氣吞湖海熱  
三十年來契濶情無端又作匆匆別屈指長安多故人

見君應問天涯客為言兩鬢已婆娑獨有此心猶似鐵  
吁嗟我老不足憐塞上征夫淚成血

遊靈巖寺

前峯俯伏如象卧後巖蹲踞如獅坐東南朝拱朗公山  
路接鷄鳴寨下過中間掩映梵王宮五花寶殿高玲瓏  
石門深鎖觀音洞峭壁斜生摩頂松松枝遙指天門樹  
老禪創始開山處面前湧出甘露泉流漿香積廚房去  
香積廚中杖錫泉黃龍白鶴相通連又添平岸池頭水

淨洗菩提種福田一重流水一重竹竹編盡是山僧屋  
上方下界知幾重銀杏紅椒滿空谷山僧汲水煮新茶  
茶罷焚香看佛牙莫言此事為虛誕請君更問鐵袈裟

晚翠軒枇杷

軒前翠樹凌秋風翠色飛入軒之中固非先零之蒲柳  
亦豈早彫之梧桐奇材乃是盧家果碧玉枝頭琢成顆  
清氣吹寒上畫屏隔窓影亂香雲朵霜花染作黃金丸  
飲餘酒渴詩喉乾醉拍欄干飽風味笑殺世間梅子酸

晚翠遲遲猶晚節吾儒對此心如鐵還當洗眼看蒼松  
歲暮空山卧冰雪

楊白花

楊白花別來久一杯空負花前酒東風吹去落誰家江  
北江南重回首楊白花今在否春色無情燕無偶水遠  
山長歸不歸離魂化作臨歧柳

詩送友人周宗大

霜月照孤鴻春堂語雙燕別來今幾年偶爾復相見相



見渾疑夢寐中故交話舊情無窮歡情極兮忽長嘯滿  
天颯颯生清風可憐相見未能久無奈匆匆又分手臨  
歧把袂且談詩寧用尋常一杯酒

金臺別意

黃金臺上西風起白雁叫霜天似水風外埧簾吹別離  
一聲散入秋雲裏璞玉渾金好弟兄閩南奎壁兩星明  
阿兄大力抗高華簡拔人物司銓衡第居湖海享清福  
萬里來同姜被宿贏得世間無事官神仙不食朝廷祿

歸思吟情攪肺肝  
醉呼斗酒催征鞍  
小窓後夜聽春雨  
喚醒紫荊花夢寒

送許節之還寧陽

灤源門外東風暖  
嫩染鶯黃柳絲短  
小雨乍晴香霧消  
鶯聲滿樹清如筦  
感時又度一番春  
年去年來頻送人  
不覺朱顏鏡中老  
春光又逐少年新  
世路悠悠祇如此  
眼中誰是奇男子  
若將杯酒比離情  
深似大明湖裏水  
多君思我我思君  
那忍相逢手更分  
歸到寧陽花正發

彩衣舞破東山雲

酒酣贈海靜之

我放歌君進酒酒到莫停手聊寬錦繡腸小試談天口  
一飲三百杯再飲五六斗胸中不平氣散作風雷吼此  
是宜城令尹海靜之曾在玉皇殿前走君進酒聽我歌  
等閒莫負金叵羅間日少忙日多古來豪傑俱消磨百  
歲光陰一擲梭人生不飲將如何

挽李府丞

烏夜啼愁殺人燈已昏啼轉頻啼落燕山五更月遊子  
聞之淚成血不盡空林返哺思嗚嗚啼到何時歇一聲高  
一聲低滿天涼露風淒淒愁殺人烏夜啼

行路難

北人快騎馬南人快使船馬蹶太行上舟覆瞿塘前爭  
如山翁煖土炕不怕高山與風浪

次林員外新店驛壁間三首

諫書佛骨表滇海即潮州正氣三千丈斯文第一流故

交無客送公道有人留慨想逢迎輩聞風死亦羞  
漫漫南去路隨處紀山川齊魯雲連樹秦淮水接天烏  
栖吳苑月人牧楚陵煙莫道交州遠姚安已近邊  
道經新店驛夢落楚山中王化雖無外鄉音較不同石  
屏清入畫水鏡淨涵空回首南天遠三呼祝聖躬

小亭雜詠三首

草屋壓雲低催詩雨滿畦傍牆緣土狗隔水呌田雞山  
逼嵐光重門幽草色齊東風吹不起香浸落花泥

小園通曲逕野趣浩無涯藜杖分開草芒鞋印破沙一  
聲送春鳥千片舞風花坐久詩喉渴呼童旋煮茶

心閒塵慮少耳靜市聲稀連日雨初霽滿天雲正飛樹  
低行碍笠苔厚坐沾衣徙倚無窮思斜陽倦鳥歸

春曉

曉起思依依問春春欲歸酒嫌杯底淺花恨樹頭稀見  
客犬忽吠避人鶯亂飛醉呼童子去掩上小柴扉

竟陵故城

荒城遺跡在眺望欲沾巾舊塚連新塚今人雜古人斷  
碑多作礎枯木盡為薪回首東風路年年草自春

西亭雜咏

曉窗初睡起扶杖竹籬東鳥跡真如篆蟲形曲似弓草  
痕輸嫩綠花辦墮殘紅一幅天然畫吟翁指點中

宋玉石

楚山一片石可愛欲何如醉卧宜醒酒閒凭好看書晚  
慚陪五客早喜識三閭零落今安在長吟恨有餘

次韓貫道亞叅寅延寺韻

禪關臨古道使節幾經過  
僧浣溪頭竹樵板石上蘿  
妙山原自好佳句不須多人境  
俱忘處披雲一嘯歌

懶出

老去髮如絲東風知不知  
新年多病酒元夜欠題詩  
犀首本非智虎頭真是癡  
偶然開醉眼春意上花枝

驪山懷古

寂寂驪山鎖夕暉我來不覺淚沾衣  
幽王烽火娛褒姒



唐帝溫泉浴貴妃芳草有情空自老  
落花無語為誰飛  
春來繡嶺多啼鳥似對行人說是非

華清池

造化融春幾許年人間留此一泓泉  
山靈不納藏冰室地脉應通浴日淵  
香霧籠晴含御氣凝脂流恨帶胡羶  
至今多少探湯手笑指當時種玉蓮

登泰山二首

朝登泰嶽望蓬萊晚帶斜陽興未回  
一路草香都是藥

千林樹老盡生苔浮雲似水流將去怪石如人立起來  
幾度叮嚀與童僕等閒休上捨身臺

萬重煙樹萬重雲今古巍巍勢自尊四面好山朝日觀  
一溪流水落天門我慚作記非王勃人說題詩有許渾  
回首忽驚歸路晚滿身清影月黃昏

趵突泉

一泓清氣湧波瀾幾度曾于醉裏看玉杵亂春珠顆碎  
水壺倒浸雪花寒龍吹海末潮聲急鬼剗山根石眼寬

誰為蒼生作霖雨天瓢攜取上雲端

題祖菴

終南萬疊此中賒金碧樓臺絢紫霞阿母許傳青鳥信  
仙人來自玉皇家雲間雞犬迎遊客雨後兒童掃落花  
世事不干黃鶴夢酒醒猶未熟胡麻

雁塔

慈恩古塔一間登瘞鶴銘亡問寺僧舊壁編題唐進士  
遠煙多見漢原陵感懷已寄無窮事縱目還須最上層

不省風鈴綠底語至今誰是佛圖澄

長安懷古

渭水橋邊獨倚欄望中原是古長安  
斬蛇赤帝留神劍墮淚銅仙泣露盤  
宮錦為帆天外落霓裳成隊月中看  
不堪回首風塵後北斗城荒雁塔寒

次許先生草亭韻

綠泱濃雲壓樹低  
吟魂清入畫圖迷  
羣蜂釀蜜爭輸課  
一鶴將雛恣啄泥  
劉向昔居天祿閣  
杜陵今住浣花溪

詩成幾度無人和閒就芙蓉葉上題

風靜疎簾落絮低雨晴香逕綠陰迷  
虎鬚半露蒲穿石龍角全舒笋透泥  
東面樹連西面樹南頭溪灌北頭溪  
更憐野鳥春聲巧似把山童小字題

和顯章宋公馬嵬坡韻

妖血流紅古道傍翠華西幸悔淫荒  
淒涼舊事空塵夢冷落殘魂送夕陽  
自昔玉顏多賈禍至今黃土尚餘香  
錦綳繡襪休深咎廊廟非才更可傷

次希聞上人韻寄許節之

記得臨歧折柳枝  
人生難會易分離  
夜長賸有思君夢  
路遠都無寄我詩  
滿院落花春去早  
一簾斜日燕歸遲  
區區功業成何用  
贏得閒愁上兩眉

次許先生見寄韻

休官深幸太平年  
家在東山汶水邊  
十里春陰饒草樹  
一庭秋色半雲煙  
閒攜白鶴隨詩社  
儘把黃金鬻義田  
遙憶歸榮堂上酒  
牆東二老釀誰先

閏九月九日榆林寫懷

風煙漠漠樹蒼蒼  
節序驚心倍感傷  
百歲幾回經閏月  
一年兩度見重陽  
菊于秋後那堪折  
鴻去霜深更自忙  
無恨幽懷嗟不得  
冰天霜冷角聲長

過紅石山

冬來天氣正嚴凝  
紅石山高策馬登  
風向眼中吹出淚  
雪沾鬚上凍成冰  
平邊豈止如擒虎  
用將何須似養鷹  
記得去年經此地  
鐵衣流汗苦炎蒸

蒙頂石花茶

聞道蒙山風味嘉，洞天深處飽煙霞。  
冰綃碎剪先春葉，石髓香粘絕品花。  
蜨眼不須煎活水，酪奴何敢鬪新芽。  
若教陸羽持公論，當是人間第一茶。

次許先生韻

十里清風舞檜杉，先生高卧白雲巖。  
苔生石上嗔人掃，花落門前許燕銜。  
自古養生惟一致，于今處世務三緘。  
老來會得閒滋味，咀嚼方知蔗境甜。



登大同角樓次劉草窓韻

彩雲飛過幾層簷樓上人呼酒載添半壁夕陽紅影瘦  
一鉤山色翠眉纖我非能畫王摩詰誰是先憂范仲淹  
遙想滕王舊時閣瀟瀟暮雨捲珠簾

東寺寒泉

一曲清泉遶寺流老懷應共此泉幽吟乘雨氣清詩骨  
醉吸水花滌酒愁天巧鑿開雲窟冷地靈分出海門秋  
飲牛洗耳渾閒事留與征人照白頭

水簾飛雪

颯颯銀河一片秋  
石梁飛濺浪花浮  
水神掃雪風為帚  
山鬼掀簾月當鉤  
玉屑散將何處去  
鏡光拖下幾時收  
莫言此景清如畫  
中有龍沙萬里愁

紅山西照

紅山高占夕陽多  
此景窮邊有幾何  
天未補時曾煉石  
日將沉處謾揮戈  
花從火樹光中落  
鳥向丹霞影裏過  
好幅畫圖牛背上  
晚風橫笛牧兒歌

襄陽懷古

衰柳斜陽古大隄秋風禾黍習家池小兒不唱攔街曲  
過客猶尋墮淚碑左傳註成元凱癖唐音刻盡浩然詩  
興亡多少傷心事惟有襄山漢水知

同唐僉憲遊吉祥寺

一灣流水白雲鄉萬疊雲籠紫翠房石鼎謾煎茶味苦  
竹爐閒煮菜根香世間山靜寺亦靜天下人忙僧不忙  
微雨乍晴風日暖綠陰深處鳥聲長

和鄒克清韻

閒臨流水靜看山樹底飛雲手可攀  
綠野舊開田二頃黃芽新葢屋三間  
春殘花逕何曾掃月落柴門尚未關  
有酒便當呼一醉青銅無處覓朱顏

和遊衛水韻

管絃聲裏泛仙舟笑引壺觴倚舵樓  
拖碎白雲魚網去挂殘紅日酒旗收  
閒鷗睡起沙頭立落葉飛來水面浮  
不是不歸歸未得許多詩景苦相留

和鄒克清韻

老來無復夢周公  
醉後衰顏借酒紅  
金縷且聽新樂府  
鐵衣休話舊軍功  
年年天上月長好  
歲歲世間人不同  
萬事窮通皆有命  
到頭誰拙與誰工

自詠

小園祇隔市廛東  
六月涼生四面風  
地濶盡容芳草綠  
墻低不碍夕陽紅  
烏呼烏喚聲相似  
人醉人醒趣不同  
自是文章真率會  
憑誰寫入畫圖中

次尹同仁冢宰韻

世事真如天上雲白衣蒼犬轉頭新西施不笑東施醜  
北阮空嫌南阮貧酒到醉時休勸客棊當勝處且饒人  
落花滿院鶯聲巧又是門闌一度春

端午

角黍堆盤酒滿壺喜逢佳節泛菖蒲門高不碍齊公子  
江濶難尋楚大夫昔荷聖恩頒彩扇今隨鄉俗佩靈符  
豪華爭剪寒臯舌誰向丹山問鳳雛

次馬執之韻

藜羹黍酒腹便便老向丘園過幾年  
莫笑買牛新學稼也曾騎馬舊巡邊  
一灣流水門前遠兩度閒雲樹底眠  
更有晚來堪畫處白鷗飛上釣魚船

過寺吟景

橋邊流水屋頭山楊柳陰陰晝掩關  
除却寺中無處靜不知僧外有誰閒  
軟紅香土雲遮斷新綠苔痕雨送還  
記得舊遊經此地醉吟身在畫圖間

過回中山

回中山下暫停鞭俯仰遺宮獨悵然  
王母若曾親見帝  
武皇應是早登仙  
世間味有長生果  
天下人無不死年  
寂寥茂陵陵上土  
春風依舊草芊芊

夜坐

感昔懷今坐夜深  
悠悠身世任浮沉  
三緘已錮金人口  
百鍊難銷鐵漢心  
春甕有天藏酒聖  
草堂無地著書淫  
不知誰是鍾期耳  
乘月時來一賞音



送陳宗理

去年別我出神州此日君行我復留  
客路有期空聚散  
官遊無計自沉浮  
江聲月色孤舟夜  
楓葉蘆花兩岸秋  
別後五雲宮闕曉  
相思多在鳳池頭

登伍山

大伍山上登高望  
景入新秋分外奇  
哺子燕銜禾穗米  
補巢鴉折樹頭枝  
雨添野水連天遠  
風約閒雲出岫遲  
醉眼模糊看不盡  
石屏高處為題詩

小金山

晚鐘孤寺背斜曛  
草逕閒隨曲逕分  
一水盡頭僧釣月  
萬松深處鶴巢雲  
花心已謝春將老  
山影初圓日未曛  
馬首紫藤吹不斷  
滿懷詩思亂紛紛

送李世望

相逢何事復相違  
樽酒長亭對夕暉  
北去憐君歸路遠  
南來嗟我故人稀  
烏離綠樹林無伴  
雲卧青山石有衣  
正值麥秋風景好  
馬頭吟遍到京畿

同趙伯顥遊山

遊徧南山與北山酒杯難盡故人歡  
十年夜雨論心易千里春風會面難  
遠路野花將子落隔林啼鳥欲聲乾  
浮丘更有無窮景何日重來仔細看

次韻

小園風景浩無邊都在斜陽柳影前  
榴火帶風紅滿地草煙和雨碧連天  
鵲遺巢去鳩爭入蛛曳絲來蝶倒懸  
只恐醉時情興沒預先分付與吟箋

送邢先生代作

野岸平蕪接暮煙離人初上衛河船  
沽來酒薄難成醉釣得魚多不用錢  
雲破月移沙際樹萍開風動水中天  
吟餘斜日孤帆外閒聽漁歌自在眠

遊紫金山

退休贏得老來閒跳出浮生夢覺關  
鏡影地涵三處水玉痕天鑿兩重山  
白雲為我供詩興紅葉欺人上醉顏  
自笑平生如倦鳥隨風飛去又飛還

丁亥中秋

瑟瑟西風吹雨晴可憐佳節在邊城  
百年人有幾時健  
一歲月無今夜明魯酒為誰澆  
戰骨商歌空自怨和盟  
睢陽已死汾陽老羞對兒曹說用兵

和陳學士送李天官韻

上林無事借春輝到處青山可采薇  
仕宦得閒方是貴  
世途雖好不如歸未為霖雨雲先出  
纔脫樊籠鳳已飛  
我亦年來思故國幾多時事與心違

贈朱都憲巡撫甘州

天涯喜遇舊知音，琴上無絃趣自深。  
醉挹雲山供小酌，笑呼風月入豪吟。  
十年不作還家夢，一飯難忘報國心。  
聞道酒泉憂旱久，墨池春水是甘霖。

輓林都憲尊公

五轉儒官四十年，老來歸隱向林泉。  
葢間茅屋留雲住，掃片松陰借鶴眠。  
炊黍忽成身後夢，買山虛費杖頭錢。  
郎君鵲立青霄上，分得恩波及墓田。

九月九日夜兀坐誦潘邠老滿城風雨近重陽  
之句因為韻賦

天涯歸思浩無窮  
夜夜家山客夢中  
何似今宵眠不得  
一庭黃葉鬧秋風

回山王母宮

回山寂寞翠華遙  
上有仙宮接絳霄  
渺渺西池在何許  
行人猶自說前朝

扇面小景

金史卷一百八十六  
放鶴庭前木葉稀修琴人去幾時歸山中無處着塵土  
流水滿溪雲亂飛

馬憲副畫

襟懷還比楚山高一路風霜屬憲曹  
櫪下久知淹驥足不知誰是九方臯

四皓圍碁

暴楚強秦一局收那應未着更安劉  
就中諸呂真勍敵賴得傍觀有絳侯



王都閭扇面

晚歸披得一蓑煙寂寂閒雲鎖釣船却恐風吹過溪去  
沙頭驚起白鷗眠

東風吹夢過江南小促飛觴擁笑談莫怪玉人歌未了  
滿庭花雨正春酣

吉祥寺

石鼎煙消午漏遲閒情偏與靜相宜老僧斜枕松根卧  
雲去雲來總不知

白雪樓

古郢城邊秋草深我來無處覓知音  
朱簾畫棟俱塵土  
千載誰傳宋玉心

西渡

桃花渡近莫愁村不似劉家妬婦津  
薄暮雨寒催鼓棹  
隔江應有未歸人

白秀才小扇景

水雲堆裏小樓臺石逕無塵長綠苔  
何處幽人特相訪

兩舟撐入柳陰來

咏牡丹

看花曾醉上林春  
夢裏光陰記不真  
今日窮途頭似雪  
好花都屬少年人

平遠亭

城上脩然結數椽  
登臨正值雨晴天  
不知老眼寬多少  
一點青山小似拳

吉祥寺薛憲副拈出韻

竹聲清與鳥聲兼  
花影重重轉過簾  
更是隔溪山頂上  
白雲如笠半垂簷

次吳儀賓韻

醉裊吟鞭自唱酬  
不知何處有離愁  
數聲啼鳥雨初霽  
雲影滿溪春水流

朱門

聞說朱門夜半開  
楚王時喚莫愁來  
于今滿地皆荊棘  
野鳥不啼人自哀

梅仙臺

居攝金縢不可論先生名跡至今存此臺不為神仙築  
要望南陽白水村

豐樂河

郢北鄢南土脉肥人家老不識年飢蹇驢馱醉斜陽外  
知是秋成賽社歸

中秋無月

年年遇着中秋節活計雖貧強自歡不似今年貧得甚

倚欄無箇月明看

小畫

滿屋閒雲一徑苔  
眼前無處著塵埃  
隔溪小犬驚休吠  
應是漁翁送酒來

金瓶牡丹

萬歲山前春雨寒  
五侯亭館倚雕欄  
莫輕今日窮途眼  
曾向金瓶賞牡丹

鸚鵡

花落梨園宿雨晴東風枝上夢初醒  
雪衣娘子調新譜  
學得霓裳第幾聲

袁安卧雪

卧雪丰姿入畫清當時令尹亦多情  
于今縱有袁安在  
雪裏誰來問死生

謝安圖

高卧東山歲月多放情聲妓欲如何  
後來始為蒼生起  
却聽桓伊席上歌

拍板

有聲無字耳通神六片紅牙萬種春  
可惜楊環差一拍  
東風吹入馬嵬塵

東園聞鶯

草色遙分一徑斜竹籬茅舍是誰家  
樹頭聽得黃鸝語  
恰似嗔人折杏花

題十樣錦草

睢陽墳上雨瀟瀟千古徒憐百戰勞  
魂魄化為原上草



猶穿十樣錦征袍

蜀中送趙伯顥還廣陽

濯錦江頭酒一觴  
孤舟煙雨渺茫茫  
離情好似江頭水  
一路隨君到廣陽

竹

湘妃分翠滿蒼梧  
管領春風叫鷓鴣  
我欲放舟閒載酒  
紫簫吹過洞庭湖

遊城東


纔上肩輿便有詩  
石門城外暮春時  
東風似解遊人意  
留得殘紅一兩枝

奏凱

犬戎巢穴一時平  
手挽銀河洗甲兵  
回首狼烽無處覓  
只留寒月照邊城

春寒

二月邊城雪尚飛  
年年草色見春遲  
不知上苑新桃李  
開到東風第幾枝



石倉歷代詩選卷三百八十六